

曾文正公奏稿

曾文正公奏稿

卷之二十目錄

奉 旨垂詢各路軍情分條覆奏摺

同治元年八月十二日

籌辦廣德受降事宜分別遣留摺

全日

近日軍情片

查覆何桂清退守情形摺

八月二十九日

近日軍情片

唐訓方駐紮臨淮摺

閏八月十二日

請 簡親信大臣會辦軍務片

覆陳皖北軍情並察度苗練摺

閏八月二十七日

近日軍情片

彙報軍情請調多隆阿軍回皖摺

九月十二日

甯國縣失守片

彙報近日軍情摺

九月二十七日

水陸迭勝力保蕪湖金柱關摺

十月十二日

近日軍情片

縷陳金陵各營苦守情形摺

十月二十七日

近日軍情仍請簡派大臣會辦軍務片

奉

旨垂詢各路軍情分條覆奏摺

同治元年八月十二

奏爲疊奉

諭旨垂詢各路軍情分條覆奏仰祈

聖鑒事竊臣近日以來疊奉

寄諭指示各路軍情縷晰周詳其中有臣職分應籌之事亦有非臣力能兼顧之端謹就聞見所及勉竭愚慮分條具陳以備聖明參核

一多隆阿一軍當四月十五日初克廬州之時臣本欲其會攻金陵以曾國荃由南岸進兵先破大勝關圍逼城南雨花臺一帶以多隆阿由北岸進兵先攻九洑洲圍逼城北紫金山一帶

曾於五月十七日附片具奏意在先復江蘇財賦之區以爲明年籌辦京漕之地不料陝西告警羽檄交馳官文等奏請多隆阿率師援秦而

諭旨亦飭令先保陝西臣雖覺金陵兵單機會可惜然以秦晉爲京師餉源所自出未敢奏調多隆阿西援之師轉而東征也厥後粵逆回竄秦事稍鬆而漢回仇殺望援仍切欽奉六月初七初九日兩次

寄諭以多隆阿應於何地駐紮飭臣與官文會商復奏其時甯國已克南岸兵力足敷調遣臣先已附片奏明矣因咨達多隆阿不必回顧蘇皖或速剿陝省或畱駐河南請其定計由官文

主稿復奏官文是否已奏尙未准咨到摺稿多隆阿旋於七月二十二日覆奏想邀

聖鑒茲復欽奉七月十九日

寄諭多隆阿一軍已阻於賊之南不能赴陝卽著勝保督辦陝西軍務多隆阿旣可無須入陝應於何處駐紮著曾國藩酌量調派迅速具奏又奉七月二十四日

寄諭多隆阿雷正綰等軍祇令其剿辦南陽一帶賊匪亮不久卽可戡事以後多隆阿等軍或須駐防廬郡一帶或須赴江南會同進剿均著曾國藩酌量調度迅速奏聞各等因欽此

聖懷謙挹殷殷下問曷勝悚感臣查多隆阿軍抵襄陽由光化

荆子關入秦並不爲南陽之賊所阻南陽賊股經鄂軍金國琛等會剿解圍亦尙不至爲楚疆之患勝保此次奏報殊未確實致

朝廷久經派定援秦之局又復中變雷正綰前隊已於十一日起行入關多隆阿後幫亦於二十二日起行繼進中途接奉改派之

旨不知從何處折回若業抵秦境則進退兩難秦人雲霓之望是否籲請多隆阿畱陝臣尙不能懸揣若多隆阿果回鄂境則當遵

旨駐紮南陽一帶食鄂省之餉擊豫省之賊凡捻匪有竄入南

汝兩府者責成多隆阿攔截雕斲痛斲數次聲威必振西可屏蔽秦中不令增捻續竄關陝南可保障楚省不令鄂北另籌防兵北可聯絡鄭元善葉裕之師東可聯絡蔣凝學潁州之師誠爲一舉而數善皆備勦捻以馬隊爲先僧格林沁捷伐於豫東多隆阿馳騁於豫西當可肅清中原有裨全局至於防守廬州石清吉本係多隆阿部將不須該將軍親往駐守圍攻金陵鮑超已定由東壩前進不須該將軍遽往會勦非謂江南不必添兵也鄂豫秦三省交匯之區不可無大枝勁旅以爲游擊之師也是否有當恭候聖裁



一裏下河一帶屢塵

聖懷江南之賊若由常熟江陰偷渡北岸之靖江如皋通州海門等處實屬防不勝防前奉六月十四日

廷寄因都興阿奏難民紛投裏下河其情可疑

諭旨飭都興阿嚴密防範飭臣實力稽察不可使一賊偷渡江北又奉六月十八日

廷寄鈔示潘祖蔭請防裏下河一片

諭旨飭令設法兼顧又奉十九日

寄諭亦以江北港汊紛歧飭令臣與都興阿力籌守禦裏下河

毋稍疎懈各等因欽此仰見

聖主睠念淮揚各屬刻刻不忘臣秉承

睿謨亦自兢兢在抱惟戰船太單地方太廣鞭長莫及徒切殷憂頃又接李鴻章咨稱據蘇州密探僞普王楊輔清自甯國敗回僞護王陳坤書自揚州敗回均來蘇城與僞忠王商議金陵危急皖浙官軍分路進剿上游已無路可竄欲分大股由江陰福山楊林各口窺竄江北襲下河空虛之處就食於完善之區並先擄有商船一二百號預勾江洋盜匪爲導引乘閒偷渡北岸等語臣查楊輔清陳坤書兩股及青陽古隆賢等一股三支敗賊窮無所之思竄江北係屬意中之事李鴻章業已專案具奏請

飭都興阿黃彬等嚴防以臣愚見都興阿之兵力只有此數紅單船之勇丁不甚可靠其新調之紅單船四十號據勞崇光咨已在廣東省河爲颶風所壞矣是江北應防之要地尙無專汛派防之水師臣現咨商楊載福囑其親赴下游徧歷靖江如皋通州海門數百里江面察看何處最衝何處次衝妥籌布置又擬另辦太湖水師一軍造船百六十號防剿上海松江由澱湖以入蘇州而騰出黃翼升水軍專防淮揚裏下河一帶以符原議星夜趕辦計四箇月可以集事目下太湖水師尙未辦成黃翼升不可離滬所有裏下河之防應請

諭飭都興阿黃彬引爲專責臣亦當力籌兼顧仍請

飭下僧格林沁吳棠萬一賊竄裏下河卽於清江浦嚴兵以待此等敗殘股匪不難一戰殲之雖未必果有其事而究當預備不虞是否有當恭候

訓示

一李世忠一軍前奉

諭旨歸臣節制調度頃袁甲三告病開缺又奉七月初八日

寄諭飭臣妥爲駕馭又曾奉六月初四日

密諭有人奏李世忠所克復城池皆伊踞守與陷於賊中無異

飭臣妥爲駕馭使就範圍各等因欽此臣查李世忠投誠之初

勝保奏明准帶一萬八千人實數蓋近三萬以降人而仍據其

地仍統其眾當時辦法本未妥善近聞陸續招收且增至五六萬之多據有城池自爲風氣於長淮五河等設釐卡數處於長江新河口設釐卡一處各縣亦有卡局所獲頗厚又廣運鹽斤自捆自賣上侵公家之利下爲商民之害殊堪隱憂然相沿已久安之若素今欲大振紀綱繩以法律勢必有所不能且去冬今春克復天長六合浦口江浦擊退陳坤書股匪於大局不爲無功未可沒其勞而遽議其後臣擬姑循其舊不設機心釐鹽之利不加禁遏偶有請求亦不拒絕前曾解濟軍火三批米糧兩批近又來請餉銀卽當量力分潤仰副朝廷寬厚之意但不甚資其力亦不輕調其兵暗銷其于智自

雄非我莫屬之驕志若欲收回

國家利權則須另籌鉅款按日供支足以養彼之眾乃能行吾之法臣於本年三月奏請廣東抽釐一案聲明分濟袁甲三一軍乃能撫馭降將卽係指李世忠言之將來袁甲三去位臣節制此軍亦專盼粵東之釐作滁州之餉聞晏端書到廣東後竭力經營事多掣肘至今尙無頭緒亦未報解分毫若廣東釐金不能大有起色則不特皖浙欠餉無出卽李世忠一軍亦終虞其決裂區區愚慮不敢不預陳其略

一鎮江一軍前奉五月二十一日

寄諭飭臣統籌兼顧頃又准馮子材咨到摺稿恭錄

諭旨有隨時稟請督臣曾國藩指授機宜以期萬全無失之訓臣之愚陋何足諳悉機宜

寵眷愈隆悚惕無地馮子材專員來皖函商一切臣覆函以鎮江餉絀兵單只宜自守不能出戰待鮑超攻克東壩溧陽溧水句容等處屯駐金陵之東北能與鎮江聯絡一氣不爲賊氛所梗屆時馮子材再行撥兵會剿庶幾聲援四應士氣易奮至署撫臣李鴻章久有移駐鎮江之議無如僞忠王糾率大股悍賊常在松滬一帶戰爭不休前五月二十一日虹橋之役頃八月初二日七寶街之役我軍皆竭力血戰始獲大捷觀忠逆之志似欲甘心於滬上而洋人坐觀成敗極難調護以目下而論李

鴻章有萬不可離滬之勢或俟太湖水師辦成李鴻章卽統水陸諸軍由松滬進兵入蘇亦屬因利乘便之法所有鎮江防務應始終責成馮子材耐苦堅守不作出勦之計拙謀淺慮未審當否

以上四條皆兩月內所奉

諭旨因事理重大道途遙遠籌畫難定覆奏稍遲理合併案具陳伏乞

聖慈垂鑒逐條

訓示謹

奏



籌辦廣德州受降事宜分別遣留摺

同治元年八月十二日

奏爲籌辦廣德州受降事宜分別遣留恭摺仰祈

聖鑒事竊僞保王童容海率眾乞降襲取廣德州城臣擬酌留

二千人餘悉遣散前於七月初二日附片具奏在案旋據鮑超

來文童容海既取州城襲殺侍逆所派守賊僞閩天義馬桂功

並收其眾現在部下一律薙髮不止六七萬人請多畱降卒立

爲啟化營以資攻剿呈繳僞印三百五十八顆僞官照九百五

十二張竇送來省並轉據童容海自陳本係洪姓因被脇所改

請卽更正等情臣以洪容海自拔來歸應准復還本姓惟所部

過眾不特野性難於撫馴卽餉項亦難於供億因令挑留三千

人編立五營餘則悉數遣散飭直隸宣化鎮總兵宋國永已革  
江西吉安府知府曾詠辦理遣散事件各繳軍械發給護照並  
川資錢一千文分遣回籍竭力湊解錢三萬串尙不知足數遣  
資否另製造發被脅良民旗號於降人中擇明幹頭目帶領由  
陸路分起行走視各省人數多寡或合數府爲一起或合數縣  
爲一起每起少者四百多者不過千人果能沿途約束嚴明一  
無滋擾俟該頭目等回營准其錄用酌予保獎以結其心當不  
至變生意外至洪容海數年被擄一旦自新乃能計取堅城襲  
殺守賊力圖晚蓋非假以虛名恐不足以馭下合無仰懇  
天恩賞給降將洪容海游擊虛銜其部下頭目王永虎范長根

陶成有莫志祥汪維新李敦本等均請

賞給五品頂戴能正玉羅文必黃廣興蔣台麟朱大椒黃三元  
宣鴻猷洪鉅海洪潮海洪青海洪四海洪龍海洪虎海洪富海  
洪貴海洪華海洪晏海等均請

賞給六品頂戴仍俟續有勞績由臣分別奏保官階使悔罪投  
誠者知

朝廷有倖邀之

寬典無顧惜之功名則東南逋寇或皆聞風知勸瓦解冰消於  
軍事不無裨益如此起降眾辦理或有未妥另生枝節臣當隨  
時奏明不敢稍存迴護上煩

宸廔所有籌辦廣德州受降分別遣畱緣由恭摺具陳伏乞

皇上聖鑒訓示謹

奏

近日軍情片 同治元年八月十二日

再近日軍情金陵賊匪未撲官軍營盤曾國荃因營中病勇過多亦未進攻鮑超克復甯國已逾月餘因童容海投誠之事久未就緒又疾疫流行死亡相繼尙未拔營現值天氣稍涼卽當催令進兵左宗棠在浙亦苦營中患病者多不能指擣如意自七月十七日油埠一戰大捷後二十一日與賊遇於靑塘斬首百餘二十四日分兵進攻裘家太平祝兩處均未甚得手僞侍逆李世賢現在金華修城治濠並調溫處之賊萃於該郡將爲死守之計龍游縣城雖已檄調劉培元等軍進攻該處地勢平衍難以逼城立營一時未能速下蔣益澧一軍七月十六日已

入江西之萍鄉縣境日內當可陸續抵浙皖北苗沛霖之黨曾稟明蔣凝學願退出壽州正陽關兩處但求不報克復等情似不至遽生他變惟撫臣李續宜聞訃丁憂病久未痊不能治事該撫前在六安患病臣勸令請假醫調李續宜恐勞

聖廬未敢具奏茲於八月初三日行抵安慶省城臣觀其哀毀之餘肌肉全瘦若不令其離營回籍少伸孝思恐難期其速痊該撫於昨十九日具摺陳情臣是以未經勸阻理合一併瀆陳聖聽伏乞

慈鑒謹

奏

查覆何桂清退守情形摺

同治元年八月二十九日

奏爲遵

旨查明復奏仰祈

聖鑒事竊臣接准部咨同治元年五月初七日奉

上諭刑部奏據何桂清呈出司道公稟請飭查辦等語何桂清  
棄城逃避罪名業經大學士會同刑部審擬具奏惟據片稱該  
革員呈出司道公稟一件係前任江蘇按察使查文經前任江  
甯布政使薛煥前任江南鹽巡道英祿江安糧道王朝綸於丹  
陽失守後聯銜稟請何桂清退守蘇州各情該司道等均有地  
方之責當常州危急之際應如何幫同總督竭力守禦乃聯銜

稟請退守蘇州顯係見事危急意在同逃徐有壬原參摺內亦有何桂清率領地方官退避之語若不從嚴查辦何以肅軍律而飭官方著曾國藩李鴻章將該司道當時如何聯銜具稟及如何退避各情形據實查明具奏其蘇常等處各逃官一併查明參辦殉難各員並著查請議卹以示勸懲欽此臣比卽咨商李鴻章在於蘇境詳查旋據通商大臣薛煥遞到節略一函內鈔錄

廷寄二件奏稿二件咨稿一件據稱薛煥於咸豐九年十二月補授江甯布政司奉

旨飭令隨同何桂清辦理夷務十年三月奉



命幫辦通商事件閏三月初旬由上海轉棹常州奉

旨飭令單銜奏事二十四日何桂清欽奉十八日密寄

諭旨至所稱薛煥應否豫飭來京此言殊屬非是天津非議和之地該大臣仍當飭薛煥迅赴上海設法挽救等因欽此薛煥旋於三十日拜疏起程摺尾聲明卽日前赴上海相機酌辦維時何桂清業已議定移駐蘇州其司道公請之稟係查文經主稿迨何桂清批發後亦係查文經錄批轉咨薛煥嗣於四月十一日撫臣徐有壬奏調薛煥回蘇辦理防務奉

旨著不准行欽此錄送各件到臣皖營臣伏查刑部奏請飭查司道四人中惟薛煥官職最大茲該大臣鈔送案據前既奉有

迅赴上海之

旨後又奉有不准回蘇之

旨則是理應離開常州之員軍機處必有檔案可稽其稟請移駐一節係屬隨眾聯銜並非別有私圖此外如查文經業已革職臣奉五月二十六日

密諭另有交查事件英祿業由吳棠奏參以原品休致王朝綸列銜在末不過隨同畫諾臣在外多年忝任封疆竊見督撫權重由來已久黜陟司道榮辱終身風旨所在能使人先事而逢迎既事而隱飾不特司道不肯違其情卽軍民亦不敢忤其意十年七月嘉興大營將弁聯名數十具呈請畱何桂清在蘇暫

不解京求臣轉奏由王有齡移咨到臣臣暗加察訪不過通知  
軍中數人並非合營皆知是以未及代奏而王有齡已兩次具  
奏觀營員請畱之呈則司道請移之稟蓋可類推無庸深究疆  
吏以城守爲大節不宜以僚屬之一言爲進止大臣以心迹定  
罪狀不必以公稟之有無爲權衡區區愚見不審有當萬一否  
除查文經交查之案另行覆奏蘇常等處逃官由李鴻章彙案  
會參外所有遵

旨查明緣由謹會同署江蘇巡撫臣李鴻章恭摺覆奏伏乞  
聖鑒訓示謹

奏

近日軍情片 同治元年八月二十九日

再近日軍情洪容海投誠以後進剿建平小挫而退其部下頭  
目眾多各爭雄長中懷反側洪容海不能彈壓有僞目張得勝  
陶子高等帶二萬餘人投歸僞輔王楊七麻處又有僞目朱大  
椒黃三元等帶二萬餘人在廣德州內亂與洪容海自相仇殺  
洪容海帶心腹萬餘人奪門而出投歸甯國鮑超營次廣德州  
遂仍爲賊所佔踞鮑超仍照前議令洪容海酌畱三千人編立  
五營隨同官兵打仗攻克廣德以贖前愆臣昨於十二日具奏  
此案摺尾聲明恐其另生枝節今果有此一變目下事局尙未  
大定是否更有波折殊難預決頃奉七月二十八日

寄諭以洪容海降眾六萬不妨酌量多畱惜

諭旨遲到半月不及欽遵辦理然招降之事古無良策必降將之才足以統馭其黨而後無反覆爭鬪之虞又必官兵之氣足以懾服降人而後無幹弱枝強之患今洪容海歸順之眾雖較前數大減然後患亦較少臣尚不深以爲慮臣之所憂慮者現在楊輔清黃文金賴文鴻吉隆賢等諸僞王屬集於廣德建平一帶又有已降復叛之張得勝朱大椒等凶燄彌增又據左宗棠咨僞侍王將由浙境赴援金陵自甯國廣德決戰而往羣賊將萃於皖南而鮑超營中疾疫大作勇夫病者萬餘人死者日數十人張運蘭朱品隆唐義訓各軍亦十人而病其六七張運

蘭之胞弟張運桂亦已病故卽去臘堅守徽州苦戰得全者也  
曾國荃金陵營中病者亦逾萬數皆由臣以菲材妄竊高位上  
干鬼神之譴莫救厄運之災左宗棠軍中病者亦復過半每次  
出隊不滿五成若秋間有大股惡戰深恐羸卒不足禦強寇中  
夜縈思不勝焦灼至李鴻章奏洪首逆已移居蘇州係屬謠傳  
並無其事此軍務最大關鍵臣不敢不畱心訪察除俟洪容海  
投誠之事大定另案續奏暨張運桂等立功後病故各員彙奏  
請卹外謹將近日軍情附陳梗概伏求

皇太后

皇上聖鑒謹

奏

唐訓方駐紮臨淮摺 同治元年閏八月十二日

奏爲暫署撫臣接辦皖北軍務遵

旨酌度駐紮地方恭摺覆陳仰祈

聖鑒事竊臣承准議政王軍機大臣字寄同治元年八月十七日奉

上諭李續宜奏瀝陳哀州籲懇賞假回籍奔喪一摺已降旨賞假百日准其回籍並令唐訓方暫署安徽巡撫閻敬銘署理湖北藩司矣皖省粵逆雖就肅清而徐宿蒙亳等處捻匪屢次出巢肆擾且正陽關壽州各處苗練眈眈虎視亦未必帖耳就撫是皖北軍務未可稍鬆曾國藩節制四省軍務綦繁現值進剿



金陵調度正當喫緊皖北關係緊要必須得人督辦俾曾國藩  
得以專意東征據李續宜奏稱唐訓方久歷戎行熟諳戰守著  
官文速飭該藩司前赴安慶接署安徽撫篆毋稍遲延其應否  
駐紮臨淮接統袁甲三一軍之處並著曾國藩酌度具奏等因  
欽此仰見

聖主慎重巖疆虛衷博訪欽悚曷任臣維皖北形勢以淮水爲  
綱領前此髮匪盛於淮南捻匪擾於淮北袁甲三駐紮臨淮跨  
兩淮而處其中上年秋間苗沛霖攻陷壽州占淮西之數城據  
上游之津要袁甲三勢處孤危旁無應援支撐實屬不易自巢  
和廬州次第克復而髮逆掃除殆盡自三河霍邱羣圩效順而

苗黨解散過半頃苗沛霖已將壽州正陽關兩處退出李續宜  
令蔣凝學進城防守大江以北長淮以南業經一律肅清地形  
之險易視賊勢爲轉移今日臨淮一關似已無甚緊要然唐訓  
方暫署皖撫仍應駐紮臨淮乃足以資控制李續宜所部在皖  
境者約分五枝一曰安肅道蔣凝學進次壽州分防潁壽正陽  
關三處一曰記名提督蕭慶衍駐軍霍邱與正陽三河尖爲犄  
角之勢一曰記名提督成大吉一曰道員毛有銘兩軍皆駐三  
河尖附近之望岡集並由成大吉分撥一營出駐河南之固始  
縣城一曰總兵王載駟畱守六安州爲各軍保固後路接應糧  
械淮西各城布置極爲周密若唐訓方進駐臨淮關則西可聯

絡蔣凝學壽穎之師東可聯絡吳棠清江之師南可聯絡石清  
吉廬州之師與李世忠滁州之師而北路亦可稍助僧格林沁  
之聲援若不駐臨淮則中段空虛恐徐宿蒙亳之羣捻又將窺  
伺淮南關係甚大不可不防聞唐訓方擬於閏八月中旬由鄂  
起行來皖俟其到省臣當與之熟商卽接統袁甲三一軍汰弱  
留強昕宵訓練楚皖各軍聯爲一氣庶幾防剿兼施首尾皆應  
是否有當伏候

聖主裁奪

敕下唐訓方妥籌辦理所有遵

旨酌度緣由恭摺覆陳伏乞

皇上聖鑒訓示謹奏

請簡親信大臣會辦軍務片

同治元年閏八月十二日

再大江南岸各軍疾疫盛行臣於八月二十九日附片具奏在案近日秋氣已深而疫病未息甯國所屬境內最甚金陵次之徽州衢州次之水師及上海蕪湖各軍亦皆厲疫繁興死亡相繼鮑超一軍據初二日開單稟報除已痊外現病者六千六百七十人其已死者數千尙未查得確數甯國府城內外尸骸狼籍無人收埋病者無人侍藥甚至一棚之內無人炊爨其軍中著名猛將如黃慶伍華瀚等先後物故鮑超亦染病甚重合營將領因其關係至大一面稟明臣處一面用舟送鮑超至蕪湖養病張運蘭一軍駐紮太平旌德等處病者尤多卽求一繕稟

之書識送信之夫役亦難其人張運蘭送其弟之櫬至祁門亦自患病尙難回營皖南道姚體備至嶺外查閱一次歸卽染病不起臣派營務處四品卿銜甘晉至甯國一行現亦染病回省楊岳斌自揚州歸來亦抱重病天降大戾近世罕聞惡耗頻來心膽俱碎若有大股賊匪撲犯甯國旌太等處鮑超張運蘭兩軍不特不能出隊迎戰並不能堅守城壘不特不能堅守以待外援並不能預逃以待再振若撲犯金陵徽州亦深恐病者太多戰守皆無把握數年來千辛萬苦戰爭之土地由尺寸而廣至數百里尙有疎虞何堪設想若皖南藩籬一壞則江西內地空虛毫無足恃興言及此憂心如焚而皖北苗捻兩患時時可

慮袁甲三李續宜皆將回籍唐訓方新來諸事且萃於微臣一人之身疾疫之災既如彼責任之重又如此臣自度薄德不足以挽厄運菲才不足以支危局譬諸擔夫力能負百斤者增至百二十斤則汗流而蹇增至百五十斤則僵踣矣臣力本不勝百斤今且增至數十倍之重僵踣不足惜倘遂貽誤大局敢不祇懼合無籲懇

皇太后

皇上天恩簡派在京親信大臣馳赴大江以南與臣會辦諸務分重大之責任挽艱難之氣數臣具有天良斷不敢稍存推諉致誤戎機今年軍事甫順而疾疫流行休咎之徵莫可推測中

夜默思惟求德器遠勝於臣者主持東南大局而臣亦竭力經營而左右之庶幾補救於萬一區區愚忱伏乞  
聖慈垂鑒訓示謹

奏



覆陳皖北軍情並察度苗練摺

同治元年閏八月二十七日

奏爲欽奉

諭旨恭摺覆陳仰祈

聖鑒事竊

臣

承准議政王軍機大臣字寄閏八月十二日奉

上諭僧格林沁現飭富和並添派之翼長全順會同恆齡卓明  
阿馬隊駐紮永城一俟永亳一帶積潦漸消道路可行卽行相  
機進剿亳州擒巢該擒等股迭經痛剿一經直搗老巢勢必窮  
思鋌走若令東西分竄官軍移向各路往追賊又繞路回巢官  
軍又復回攻必致往來周折爲所牽制此等情形總當預爲籌  
畫謀定後動方免臨時互相推諉貽誤事機僧格林沁現在夏

臣將由北路進兵將來各路約齊會剿之時賊如竄往北路自應卽由該大臣撥兵追剿其賊竄西路應由唐訓方撥兵追剿賊竄東路應由吳棠撥兵追剿賊若南竄卽行三路合力追剿均著各專責成先期妥爲布置毋得臨事觀望遷延自干罪戾其毛昶熙所部駐紮營廓等處勇營併著僧格林沁酌量隨同官軍應由何路進攻妥爲調遣楚軍應由南路進攻其西路賊竄責令追剿是否足敷分撥有無窒礙難行之處唐訓方署理撫篆甫莅皖軍於進兵情勢未知能否洞悉旣據僧格林沁將督催楚軍進剿捻巢各情移咨曾國藩酌量調度卽著妥爲籌議並將駐紮潁郡楚軍道員蔣凝學是否堪以統帶抑應添派

得力提鎮大員督率之處一併妥籌兼顧並一面咨復僧格林沁辦理吳棠駐軍清淮籌防裏下河一帶於亳州東路靈宿等處亦恐相距稍遠黃開榜派赴徐州代領田在田一軍應令如何酌量進紮袁甲三尙駐臨淮其於亳捻東路防剿應與吳棠等如何各分汛地合力進攻之處均當預爲籌定總之各路責成均須嚴密部勒方能及時同心戮力聲勢聯絡著該大臣等會同詳悉商酌盡善迅卽奏聞鄭元善現赴河洛督辦西路剿匪所統各軍雖難卽時撤回助剿惟亳捻如由西北兩面竄走均係豫境卽著鄭元善毛昶熙嚴飭各屬文武官紳率領兵練協同官軍悉力防剿如有賊由何路竄逸不能實力堵禦該地

方官吏與帶兵將領厥罪維均苗沛霖反覆再三其叵測情狀天下聞知目前歸正仍恐其首鼠兩端第以勝保赴陝失所據依兼之畏懼楚師之威始將壽州正陽等處釐卡交出姑且就我滿磨僧格林沁以現當剿捻喫緊之際勢宜恩威並用以不疑用之勦賊賊平之後苗練勢孤自必盡除傲慢且使苗練安帖則將擬學所領楚軍便可專力與僧格林沁之軍合力各由南北進剿捻巢以期得力所籌自是不爲無見此次苗沛霖因僧格林沁札諭該練欲用之勦捻乘機具稟申訴揣其意一則欲借僧格林沁聲威抑制李續宜撤去楚師使彼得以逞志一則欲借剿捻之名冀僧格林沁奏准仍復還其前次占踞之

利藪一面之詞毫無情理而陰鷙之謀時流露於意言之表苗沛霖如果能帶練剿賊爲國出力朝廷屢經明諭貫其既往予以自新該大臣等何難待之坦白盡釋猜嫌但必須其實心實力悔罪歸誠有殺賊攻城之實據方可加之信任若仍心跡闇昧或陽爲助剿而仍與賊陰相結納或第欲冒官練之名以脅制民圩希圖煽惑漸成尾大不掉之勢其居心行事朝廷亦必洞見肺肝諒該大臣等亦斷不以欲資其力稍涉遷就致爲所惑而忘後患著僧格林沁曾國藩等會同察度妥籌萬善正陽等處釐卡旣已交出卽該練等果隨同奮勉剿賊心跡已明曾國藩等並當籌給餉需至壽州正陽關等處利源所在斷不得

令該練等藉詞餉需再圖侵佔前次逆首陳玉成就擒壽州其餘賊驍悍之眾尙有二千餘人苗沛霖收隸所部現在曾否遣散其竄擾豫省南陽一股擒逆內有無此項陳逆餘黨並著僧格林沁等查明具奏等因欽此仰見

聖謨閎遠布置精詳臣於二十一日接奉此

旨卽與撫臣李續宜再三商度逮二十三日李續宜登舟起程

署撫臣唐訓方怡到安慶臣又與之熟商如會剿亳州擒巢楚

軍應由南路進攻其西路賊竄責令楚軍追剿

諭旨垂詢是否足敷分撥有無窒礙一節查李續宜所部湘勇在皖境者萬餘人現在分守潁州壽州六安霍邱固始五城又

守三河尖正陽關兩隘皆係最要之區若再令分剿擒巢則防守七處之兵與進剿亳州南之兵皆嫌其單湘軍素無馬隊於追逐擒匪本不相宜若步軍太單則更無把握矣屢接官文函咨石清吉防守廬州之十營前已調去三營今又欲再調三營回援鄂省並云髮匪自德安而下欲由安慶境內回援金陵如果屬實皖北腹地空虛處處可慮願壽之湘勇以分守七處而太單廬州之防兵以抽調六營而亦薄更無餘力可以進剿亳州南此楚軍不敷分撥兼有空礙之情形也

諭旨垂詢道員蔣凝學是否可以統帶抑應添派大員督率一節據李續宜面稱蔣凝學與毛有銘同爲監司成大吉蕭慶衍

王載駟皆爲提鎮勢位相侔才智相等彼此俱難統屬至臣所部各軍如楊載福鮑超張運蘭朱品隆諸統將皆抱病未痊現在皖南軍情十分緊急臣欲求一人支持危局尙不可得又安能另派大員督率淮北剿捻之師此願壽各軍難相統馭之情形也

諭旨垂詢苗沛霖反覆叵測察度妥籌一節臣查苗沛霖詭譎多端耳目最廣聞凡李續宜離開苗部之密諭勝保參劾湘軍之微詞苗沛霖皆得鈔其全稿卽言官劾苗之疏

廷寄馭苗之法苗沛霖亦多錄其原文蔣凝學等欲陽撫之而陰防之固在苗沛霖計算之中卽僧格林沁欲調苗剿捻並欲



調苗離巢使楚軍得放心剿擒亦未嘗不在苗沛霖計算之中  
臣愚以爲欲苗之不猜疑必在我者先有誠一不欺之道欲苗  
之不反覆必在我者先有堅定不變之謀大抵馭苗之策有二  
一曰剿一曰撫撫苗之策亦有二一曰赦其罪而不資其力一  
曰資其力而並予以權凡良圩之出財出力以從苗者非心服  
也彼挾

朝命以臨之不得已而爲所脅耳自夏開黨羽離散苗勢漸衰  
今調之會剿擒巢則必聽其招集舊部號令羣圩是予以威權  
矣又必聽其廣收練稻設立釐卡是予以利權矣今日養虎自  
衛他日復欲縛虎歸柙豈易言哉臣愚以爲赦其罪而不資其

力猶不失爲中策於徵調之札則咨之使其號令不能遽振於  
釐卡之事則寬之使其生計不至遽窮情願假以利權斷不予  
以威權俾苗沛霖旣服官軍之足以自立又感疆臣之不與爭  
利或可相安無事若旣欲資其力又欲結其心而又不予以威  
權利權則斷無是理矣此臣察度苗練但用中策之微意也至  
苗沛霖所收逆首陳玉成餘眾曾否遣散是否混入南陽捻股  
之內俟訪查明確續行附奏所有遵

旨籌議緣由謹會同署安徽撫臣唐訓方由驛覆奏伏乞

皇太后

皇上聖鑒訓示再此摺係與李續宜面商定議李續宜奏明於

二十六日起程回籍因業經交印卽於二十三日  
起行具咨請  
代奏理合代爲聲明謹

奏

近日軍情片

同治元年閏八月二十七日

再近日軍情僞忠王由蘇州帶大股賊匪上援金陵屯踞城南谷裏村人字橋一帶二十日撲官軍營壘一次金陵將士多病迄未稍愈曾貞幹亦抱病未痊殊爲可慮逆首黃文金胡鼎文等大股由東垣撲犯金寶圩鮑超尙在蕪湖養病宋國永在甯國代統其軍派霆字四副營峯字兩營於距城五十里之新河莊禦之二十日始到營壘未定爲賊所乘官軍小挫退回甯國探聞黃文金等逆將自新河莊犯甯郡之西楊七麻等逆將自建平縣撲甯郡之東官軍病者太多統將鮑超又不在營張運蘭雖已於十七日帶病進城而其部卒亦病莫能興朱品隆於

十四日移守旌德亦上下皆爲病所苦防守尙無把握大疫之後遇此鉅寇皖南全局幾無一處可恃總由微臣德薄位尊莫挽厄運五夜憂灼悚皇無地所幸左宗棠於前月之杪疊獲大勝蔣益澧於十四日克復壽昌將來徽州有急或可調蔣益澧就近救援楊岳斌鮑超病皆漸愈鮑超現發徧身瘡癰邪症全除擬於二十六七日回營其軍縱有疏失尙可徐圖整頓仰賴皇上威福猶當力籌挽救定傾扶危除金陵甯國兩處接仗情形續行具奏外理合附片先陳梗概伏乞

皇太后

皇上聖鑒謹

奏

彙報軍情請調多隆阿軍回皖摺 同治元年九月十二日

奏爲彙報各路軍情請

旨敕調多隆阿一軍回駐皖北恭摺馳陳仰祈

聖鑒事竊僞忠王李秀成救援金陵黃文金等股圖犯甯國各情形臣於閏八月二十七日附陳梗概在案現計各路局勢可慮者約有四端李秀成率十餘萬賊更番猛撲雨花台營盤自閏八月二十至九月初六晝夜不息洋槍洋礮子密如雨兼有開花炸礮打入營中驚心動魄曾國荃於二十九日面受洋槍子傷幸尙無礙其得力部將倪桂卽於是日中礮殞命賊現多開地洞百道環攻並未少休又據蔣益澧來稟僞侍王李世賢

於前月十四日帶賊三四萬由浙赴援金陵我軍以病餘之卒苦守十六日夜疲乏已極若再添侍逆一股殊恐難支此金陵之可慮也胡黃諸逆之竄犯甯國者自前月二十日我軍小挫後未遽攻撲郡城盤踞於廟埠仰賢圩油榨溝新河莊等處綿亙近百里疊據逃出及擒獲匪黨僉稱該逆不得逞於甯國決計繞竄南陵青陽上犯江西目下各營病勇未痊缺額未補卽能竭力保守甯郡而灣沚無陸師駐防該逆若由閒道上趨不能分兵堵截此甯國之可慮也小丹陽之賊已由東壩拖過戰船數百號分布固城南漪各湖時圖出江我軍水師自湖口以至金陵分防二千餘里地段太長兼以營哨弁勇病者過多又



棘臣不敢獨擁重兵是以欲奏而復止欲吐而仍茹屢蒙

聖慈垂鑒今則軍情萬緊才智俱窮不得不奏添大枝勁旅保全已復之地如馬融和股匪不果竄擾皖北多隆阿回軍之後或會剿金陵老巢或會剿蒙亳擒匪再行奏明請

旨定奪除各營戰狀俟守事大定分案具奏及應獎應卹人員續行陳請外所有各路軍情謹繕摺由驛六百里馳陳伏乞

皇太后

皇上聖鑒訓示謹

奏

甯國縣失守片

同治元年九月十二日

正封摺聞又接鮑超文稱甯國縣城於九月初六日失守該縣前派韋志俊洪容海兩降將守之本屬不可深恃而韋志俊又因病就養蕪湖該縣失陷亦係意中之事惟一縣旣失則藩籬已弛現在徽州旌德兩城首當其衝守徽州者爲皖南鎮唐義訓守旌德者爲衢州鎮朱品隆兩處兵力皆單朱品隆又久病未痊缺餉過久據稱旌德百物皆空無可市買並無零錢可辦油鹽驟遇大敵深恐不克支持現催調蔣益澧一軍來援徽州旌德若兩城能如金陵甯國之堅守二旬則救兵可至矣該兩城如幸而保全又恐該逆由績溪太平閒道竄犯江西反復

籌思殊無完策臣前調朱品隆偕鮑超援解金陵之圍今旌德  
且恐不保鮑超亦三面受敵自不能抽出馳救金陵除甯國縣  
詳細戰狀另行具奏外理合附片陳明伏乞

皇太后

皇上聖鑒謹

奏

彙報近日軍情摺

同治元年九月二十七日

奏爲彙報近日軍情恭摺馳奏仰祈

聖鑒事竊金陵甯國各路軍情

臣

於九月十二日彙報梗概在

案嗣是僞侍王李世賢大股亦由浙江趕至金陵與僞忠王合力晝夜猛撲更番迭進迄未休息至九月十二日未刻兩處地道同時轟發土石上飛賊眾如牆並進前者旣殪後者復登曾國荃督飭諸將竭力堵禦純用火毬拋擲開以鎗礮搶險三時幸得堵禦缺口擊斃悍賊極多十三以後賊蹤少衰白晝不甚環攻夜間仍輪班逼撲連紮百餘壘於官軍營濠之外相距不過二十丈仍再開地道三處據密探稱俟雨夜發火轟裂希圖

一逞自閏八月廿日起計堅守已滿一月曾國荃所受洋槍子傷左頰子出之處雖未收口右脅子入之處業已結痂軍心尙屬完固大局可期平穩惟前此病卒未痊近日傷者亡者又添一千餘人疲勞太久損折彌多若無大枝勁旅從外夾擊深恐難以解圍此金陵一軍之大概情形也甯國賊目黃文金胡鼎文等久盤踞於高嶺梅嶺油榨溝新河莊等處時竄灣汴紅楊樹一帶冀圖抄我糧路張運蘭病未痊愈堅守郡城之內鮑超病體全愈屯紮距郡二十里之高祖山九月十八日鮑超派隊搦戰該逆亦排隊於仰賢圩新河莊處處依傍港汊阻水自固不敢過河與我接仗鮑超前因病者太多新愈者亦黃瘦無力

是以回營兩旬未敢進兵今見我之守禦日完賊之怯情日露  
卽日擬將高嶺梅嶺之賊痛剿數次以挫兇鋒其前在甯國縣  
城失守者爲降將韋志俊洪咨海兩部鮑超現亦飭其收集潰  
散重整隊伍隨同進剿此甯國各軍之大概情形也自閏月中  
旬大股賊至卽分僞護王陳坤書猛撲金柱關又分股上犯蕪  
湖自東垣抬過之賊船亦羣聚於金柱關上下官兵守金柱者  
陸兵僅羅逢元朱南桂等四營水軍僅彭楚漢丁泗濱等五營  
與賊相持月餘眾寡懸殊晝夜嚴防羅逢元等又分兵遠防龍  
山橋梅塘嘴一帶往返六十里疲於奔命羅逢元與朱南桂議  
以苦守太久不如渡河剿之九月十八日與駐守蕪湖之周萬

倬吳坤修等營由龍山橋暗渡會合水師齊進痛剿陸師自青山包抄而上將羣賊蹴逼落水溺斃極多水師奪賊礮船五十餘號從此賊舟無窺伺大江之慮而內河之灣汊三浚河亦均有官軍戰船扼守此水師及蕪湖金柱關陸軍之大概情形也至<sup>臣</sup>處調度有與前次奏摺不相符合者<sup>臣</sup>前調王可陞一軍馳赴雨花台幫同防守厥後王可陞帶三營先赴金陵留兩營仍防蕪湖茲因蕪湖事勢已鬆卽將兩營全行拔去又前調上海之程學啟一軍因駐防南渡要區不能抽動李鴻章擬調洋將漢兵之白齊文一軍來援金陵此軍雖非<sup>臣</sup>所甚願然亦未便卻其拯急之情阻其圖功之念都興阿未接<sup>臣</sup>咨僅接曾國

荃一箇立派楊心純等千八百人渡江協防實屬力顧大局痛癢相關前調浙江之蔣益澧一軍旋接左宗棠復箇因日內正攻龍游湯溪兩城功在垂成礙難抽撥他往蔣益澧既不能棄湯溪而換防甯國則鮑超亦不能棄甯國而先援金陵徵兵千里之外本難處處應手至李世忠一軍臣前咨調渡江由孝陵衛北路而來夾擊僞忠王一股旋因該提督來文有江防空虛南賊分股北窺之說臣卽飛咨止調令其專防北岸九洲洲一帶又因該提督來文有挑選精壯萬餘派員統援金陵之說臣又咨令自行酌量力難兼顧則專防北岸力能兼顧則分援南岸聽其自爲裁奪此又臣調度各軍前後參差之情形也至



鄂省馬融和股匪現聞將由應城一帶回竄河南或不至遽擾  
皖北仰託

聖主鴻福先紓一面之患除金陵十二日之戰金柱關十八日  
之戰俟接到稟牘另行詳報應獎應卹人員續行奏辦外所有  
彙報近日軍情恭摺由驛六百里馳奏伏乞

皇太后

皇上聖鑒謹

奏

水陸迭勝力保蕪湖金柱關摺

同治元年十月十二日

奏爲水陸各營屢獲勝仗力保蕪湖金柱關要隘恭摺馳陳仰祈

聖鑒事竊自閏八月中旬蘇杭羣賊大舉內犯北撲金陵南擾甯國中犯蕪湖金柱關所有金柱關等處水陸防守及九月十八日之捷臣國藩已將大概軍情兩次具奏在案先是僞護王陳坤書等酋擁眾四五萬突入太平府之張公橋圖犯金柱關橫斷甯國金陵之氣臣玉麟以該隘下達高淳溧水上通灣沚蕪湖爲中段第一關鍵閏八月十三日飭成發翔鄧萬林等於各營中挑集未病礮勇舢板十船會合唐修已外江水師一營

王可陞周萬倬羅逢元朱南桂陸師數營禦賊於花津護駕墩  
五戰卻之退踞薛鎮十八日諜報賊以戰艦數百由東壩拖壩  
而出布滿固城南漪兩湖臣玉麟親率王吉左光培等各駕飛  
划入湖迎擊詎薛鎮之賊節節延竄潛約賊船銜尾而西環泊  
花津上駟渡之下臣岳斌一聞此警留羅進賢萬化林水軍於  
大勝關幫助金陵陸師而自帶丁泗濱彭楚漢等五營力疾赴  
援金柱關適羅逢元朱南桂等陸軍先在姚老圩毀賊浮橋獲  
勝一次得此水陸依護賊乃數日不敢過河九月初五日賊糾  
大股至龍山橋先以排礮拒我師船遂於淺流中結筏偷渡朱  
南桂率三哨馳擊戰無逾時羅逢元帶隊突至直搗圩心王明

元力戰死之朱南桂斜刺而入截賊數段縱橫掩殺未及濟者  
悉驅入河不謂賊又增黨數千倚河築壘形若貫珠以翼乘閒  
再逞初六日賊以大隊進逼金柱關水營各船齊開排礮逆眾  
稍退復合營帶親兵前營郭明鼐與副後營丁泗濱等帶勇登  
岸奮擊馳逐里許鏖戰方酣郭明鼐突被洋礮子打穿左喉卽  
時殞命幸得丁泗濱等奮力衝突殺退賊眾搶護忠骸回船初  
八九等日朱南桂張定魁商令駐守蕪湖之周萬倬吳坤修等  
各率新後團防等營分巡查家灣梅塘諸一帶而於十二日自  
率勇士涉流而渡盡焚隔河諸壘擊斃數十人羣賊始遁往魚  
埧此間八月十三至九月十三等日水陸禦賊晝夜嚴防之情

形也。臣國藩時以金陵事急調向守蕪湖之王可陞先拔三營往援金陵而調向守廬州之梁美材三營填駐蕪湖水師之由安慶下駛者則有巡湖副中兩營其由上海折回者則有正前副右新右三營兵數較增可以一戰於是諸將弁會商十八日水陸大舉周萬倬帶所部並團防兩營哨由查家灣渡河朱南桂朱寬義帶吉左營羅逢元帶振字營由龍山橋渡河曾泗美以右營戰船扼橋下兼分水勇登岸助陣丁泗濱胡俊友率副後親兵前營水師由星子橋決堤駛入攻賊之後蔡國祥嚴定國彭楚漢率巡湖正左親兵右營水師由三汊河攻賊之前唐修已分船守太平府護定吉左振字老營仍親帶礮划同往三

汧河會剿天甫向曙分道並進遇賊於花山兩鋒相交喊聲雷  
動鏖戰數時賊不少挫周萬倬一騎當先所向辟易會泗美同  
國防兩營哨橫躍入陣刀矛環刺賊不能支且戰且走朱南桂  
羅逢元帶隊從九山埂上壓下朱寬義張定魁從九山左右兩  
路抄出賊益震懼不知所措爭向上駟渡紛紛竄遁殊不料彭  
楚漢蔡國祥等攻破三汧河釣魚台賊卡後早與丁泗濱胡俊  
友唐修己嚴定國各水營衝入上駟渡斫斷浮橋賊船五十餘  
號悉非所有該逆猝見橋折舟沈回戈轉鬪眾軍合力圍殺攔  
刃而死者半撲河而溺者半棄尸駢積河水不流自上駟渡至  
龍山橋聚賊不下萬餘無一存者奪馬三百餘匹旗械倍之此

九月十八日擊賊大勝之情形也龍山橋上駟渡之賊雖一鼓  
翦除而窰頭護駕墩大小花津官圩青山等處表延百餘里尙  
爲賊踞臣玉麟復飭成發翔喻俊明水師梁美材周萬倬吳坤  
修陸師暨王可陞留守蕪湖之二營於二十日進次馬音街會  
約吉左振字等營及水師李朝斌楊友德李助發等十營於二  
十一日裹飯傳餐侵曉出隊先用礮船渡陸師過三汊河毀平  
窰頭數壘王可陞梁美材等卽由中路搜剿官圩大龍口朱南  
桂羅逢元等復由右路搜剿青山周萬倬吳坤修等同水師選  
取護駕墩各水勇登陸焚橋周萬倬等率隊直進賊乃竄聚花  
津我軍緊躡賊後與賊搏鬪移時周萬倬困入重圍適王可陞

梁美材等由官圩聯騎衝至李朝斌喻俊明等率礮隊排擊水  
次周萬倬立刃數賊突圍躍出面面夾攻遂破花津兩岸堅巢  
獲賊划七十隻焚賊所擄聚之糧數萬石各營還駐馬音街而  
朱南桂羅逢元兩隊亦盡洗青山踞賊以歸二十三日周萬倬  
王可陞等軍冒雨巡哨襲賊敗之二十四日風雨轉猛至晚稍  
霽議於次日攻洞陽象山之賊王可陞梁美材遵陸而進羅逢  
元朱南桂周萬倬吳坤修分兩翼傍河而進李朝斌各水營自  
太平府東循隄而進甫至小橋望見賊旂數十層掩映林谷間  
周萬倬率哨官洪得勝縱轡衝入往來盪擊賊盡披靡正欲圍  
而殲之俄聞鼓角一聲象山後突出大股火機觸發槍子羣飛



周萬倬見洪得勝中槍墜馬馳救不及輒復躍入賊陣石膝受傷裏創猛戰幸王可陞帶隊來助羅逢元朱南桂亦自洞陽振旅而至合軍掩襲旣焚象山賊館並將采石磯另股賊援悉驅出薛鎮小丹陽一路二十八日成發翔喻俊明聞高瀋賊船出石臼湖聚泊小丹陽之背以護新市鎮四壘乃於二十九日留曾泗美石營堵守塘溝親帶左營定湘營進湖雕剿破壘殪賊成發翔得船十二號喻俊明得船二十八號自是賊舟之由東垣抬來者存留無幾距蕪湖金柱關六十里內無一賊矣此九月二十一至二十九日疊次剿賊獲勝之情形也臣等查金柱關一隘與蕪湖輔車相倚此次僞護王等旣由陸路全力攻撲

復於東垣抬船過湖圖竄出江以截金陵諸營之糧路安危得失關係至鉅幸仗

天威大彰撻伐保全重險江介肅清足塞諸逆酋併力一逞之心諸將士苦戰五旬始終不懈可否俟金陵賊退後容臣等彙案酌保出自逾格

鴻施至花翎總兵銜儘先副將勝勇巴圖魯郭明鼐忠勇性成英毅罕匹咸豐六年投效水營拔充哨官七年埽蕩斬黃肅清楚境八年克復九江府城進攻安慶大通樅陽等處十年派充營官攻破南陵賊圍十一年攻克安慶省城收復池州本年攻打運漕無爲東西梁山及金柱關蕪湖縣各要地均屬異常出

力戰功最著茲因登岸殺賊中礮捐軀實堪憫惜合無仰懇  
天恩追贈提督銜卽照提督陣亡例議卹以昭激勸又花翎游  
擊銜都司洪得勝擬保守備藍翎千總王明元擊賊陣亡並請  
敕部各照本銜從優議卹以慰忠魂所有水陸各軍迭獲勝仗  
力保蕪湖金柱關要隘緣由謹繕摺由驛六百里合詞馳奏伏  
乞

皇太后

皇上聖鑒訓示謹

奏

近日軍情片

同治元年十月十二日

再近日軍情北路金陵大營自十二日地道轟發我軍槍堵獲勝之後賊氛稍衰而日夜掘開地道仍不少息曾國荃飭各營添修內牆內濠又募死士乘夜突入賊營塞其地穴擒斬其酋又於內掘地道以迎之前後凡破賊之地道七處羣賊智盡能索至十月初五日出濠大戰破賊壘數十座僞忠王之精銳損折極多又撥賊數萬回救太倉州凶燄彌滅仰託

聖主威福或可解圍以去中路蕪湖金柱關等處十八大捷以後又有二十一二二十九等日勝仗賊船焚奪幾盡守局穩固臣已將詳細戰狀同日另摺具奏南路甯國府一帶鮑超於二十

一日出隊小挫一次該逆一面在上游與鮑超相持一面在下  
游灣沚方山等處與水師相拒初五日已渡過清弋江之西岸  
梗塞鮑超之糧路深恐其內犯南陵三山由池州而竄江西  
九月十二日摺內所陳可慮者四端今三慮稍紓可慮者專在  
甯國一路若再支撐一月新募之勇已到病故之缺悉補鮑超  
能出營痛剿或可力遏賊氛不令上竄除詳細戰狀另行續奏  
外理合附片先陳梗概伏乞

皇太后

皇上聖鑒謹

奏

縷陳金陵各營苦守情形摺

同治元年十月二十七日

奏爲金陵各營苦守四十六日屢獲大捷力解重圍恭摺縷陳  
仰祈

聖鑒事竊自閏八月下旬金陵賊援大至官軍堵剿迭勝經臣  
四次具陳梗概聲明續報戰狀在案旋據江蘇藩司曾國荃稟  
稱僞忠王李秀成在蘇州大會羣酋以僞輔王楊輔清及黃胡  
賴等股擾甯國以僞護王陳坤書等股由太平府窺金柱關李  
秀成親率十三僞王號稱六十萬眾專注金陵東自方山西至  
板橋鎮旗幟如林層層排列閏八月二十日糾合城賊直逼我  
營尤趨重於東西兩隅曾貞幹彭毓橘劉連捷張詩日熊登武

朱林桂等縱軍兜擊追賊於小河邊斬級頗多朱林桂搏戰方酣中槍而殞二十一日城賊援賊同時並進曾國荃令各營堅壁固守俟其撲近花籬突以排礮轟之賊乃踉伏在地礮聲絕而殺聲又起日夜環伺無或少休二十二日賊由東路攻副後南後等營西路則犯湘恆恭字等營曾貞幹方率晏恭山力戰西路一股而賊已分黨二萬徑趨洲上抄出猛字諸營之後曾國荃卽派蕭孚泗周惠堂王仕益倪桂李臣典崔文田凌有和楊錦南等分路馳剿賊爲負創卻走倪桂與左傳貴大呼衝入遇者輒殪左傳貴馬蹶戰歿賊遂擁衆回戈留踞數千人於洲上曾國荃以洲上關繫全軍糧路我所必爭乘夜急修十數壘

由曾貞幹撥兵駐之又令劉連捷遣死士縋牆出擊殺賊數十  
奪旗數百而還二十三日賊旣攻我猛字各營復昇巨礮轟東  
路營壘並駕戰艦擊湖橋營卡曾豈凡搶護礮台受傷幾危而  
賊撲益猛易良虎易良豹等正在悉力堵禦適曾貞幹督隊而  
前縱橫截殺卽時剿退仍一面會約羅進賢萬化林等移水師  
於藕塘護築新營守定隄埂而運道乃可無虞矣二十五日賊  
更以西洋火器力攻東路之副後南後嘉字長勝吉後五營而  
圍偏西路之仁嚴和智四營者已歷六晝夜彭毓橘張詩日熊  
登武李祥和曹仁美等料賊疲乏躍出濠外突破四壘殺斃及  
擒獲者三百餘人二十六七八等日夜賊乃悉向東路偏營而



陣洋槍洋礮驟若飛蝗并於嘉字吉後副後營下潛通地道百計環攻劉連捷朱洪章武明良吳光春曾昭禮等率同士卒負牆露立拋擲火毬殲賊無算曾國荃以病卒太多弗耐久戰因派李臣典調防南後營汛地二十九日賊負片板蛇行而進直薄副後諸營濠外開花礮礮橫飛入營烽燧蔽天流星布地羣賊齊聲大譟束草填濠岌岌欲上武明良劉連捷吳光春各以長矛擊刺前者拽尸後者更進曾國荃見事勢危急親率部將倪桂蕭開印前往策應倪桂馳斬悍曰轉戰無前中礮死綏曾國荃亦爲飛子傷頰血流交頤仍裹創上濠以安軍心此閏八月二十至二十九等日督軍守禦獲勝之情形也九月初一日

添賊一大枝猛驚無匹諜者曰僞侍王來自浙東其撲東路各營者恃有大援攻吉後礮台益急曾國荃引軍馳救力破賊眾吳光春陳膺福乘勢將吉後營一段堵住而王光勝劉大勝黃升富胡澤仁廖太仙等已相繼傷亡曾國荃恐有蹉跌乃留蕭開印守之維時曾貞幹與諸將謀東路地道甚近曾國荃又創口未平不可不帶兵往助遂飭黃潤昌王廷耀曾正明等堅守江東橋三汊河大勝關諸營自帶八哨疾趨而東商令各營增築內牆內濠以自固自初一以至初四等日我備愈嚴賊計轉狡若蠅若蟻倏往倏來多用箱篋實土於中排砌濠邊明防礮子於上暗鑿地道於下我軍之禦之也先以火箭攢射繼挑銳

卒誘賊近濠突出奮擊幸得少挫其鋒曾國荃熟察形勢惟西路賊陣散漫西南地面遼闊不如先發制之派彭毓橘率張詩曰熊登武李祥和劉湘南羅朝雲曹仁美等營擊右路蕭孚泗率張光明周惠堂曾良佐楊西平等營擊中路而以李臣典何玉貴成東昂陳壽武馮盛德朱平海趙清河黃東南等營擊左路初五日齊隊出濠諸道並進戰不逾時焚逆壘十二座殲斃近三千人壘中之賊罕有脫者我軍惟李臣典吳宗國負重傷李正升劉德盛吳發遠等殉焉餘尙無所損折自此西南一隅賊不敢復犯後濠矣此九月初一至初五等日節次堵殺獲勝之情形也初六日以後東路之賊環逼如初未嘗少懈朱洪章

劉連捷武明良蕭開印吳光春陳膺福等且堵且戰屢出焚賊  
傷斃約七百餘名我營亦折文喜才龍開學彭倫考劉禹祥孫  
雲亭五人幸有都興阿派楊心純等五營臣由安慶派去之喻  
榮陞等四百人先後赴援而王可陞所部亦先派三營由蕪湖  
赴援金陵兵數稍增軍威頗振無如主客相搏不數十武節短  
勢險仍不能出大隊痛勦而賊之畚插負土者已及濠牆之下  
十二日瞥見西南一股悉併東路潛伏雨花台後曾國荃知地  
道之將韞也令各營謹以備之不轉瞬而嘉字吉後兩營外一  
聲霹靂煙燄上衝石塊土塊飛入天半營牆各崩塌十數丈賊  
卽乘隙直上萬弩齊發排礮雷轟踴躍爭先呼聲動地兩路悍

黨不下萬餘人擁入塌口者各有數千人我軍寂然不動扼住內濠俟煙障一開塵土落畢武明良率各弁勇從嘉字營衝出有朱洪章楊正彪彭毓橘李祥和劉湘南羅朝雲等爲之援蕭開印胡萬清陳萬勝胡海萬戴明山吳光春陳膺福易光春暨各將弁從吉後營衝出有蕭孚泗張光明周惠堂王可陞謝占春陽華坤楊心純等爲之援亂刀交錯併力搶險陳得月陳敬廷張紹武周在遠劉安邦謝仁本周宗達胡榮祥王芳來鄭元標羅道明雷信義等死之武明良蕭開印等憤怒填臆忍死決戰塌口以內屠戮靡遺塌口以外諸賊渠擧旗督戰更番向前猛撲五六次經我軍同出抄殺賊之精銳摧折無算其地道之

同遊裂者尙有副後一營劉連捷麾軍勦退侯永清張玉藻  
蕭易珍李修祿李萼南劉星德劉泰合等死之其各軍之同被  
賊圍者尙有信字長勝義字堅字從字克字南後七營李臣典  
楊玉輝羅雨春武交清何玉貴曾昭禮喻榮陞胡松江楊西平  
朱聲平等從內擊出曾貞幹率晏叅山成東昂朱平海馮盛德  
陳壽武等從外擊入賊亦敗走是役也殺賊近萬誅偽德王及  
僞主將李蔡高范汪羅吉陳等酋我軍陣亡不過百餘人受傷  
者蕭開印吳光春李祥和胡萬清曾昭禮陳萬勝武義山張林  
芳而外弁勇不過三百餘人此九月初六至十二等日搶救地  
道力戰大勝之情形也自有此捷賊之氣燄稍衰而設謀圖我

仍百出不窮十三日旣從東路糾聚賊黨別開地道必欲甘心一逞仍於西路決長江之水淹往來之路以冀絕我饋運當經曾貞幹易良虎在高埂增修小營分哨填紮商令水師劉正隆賴榮光陳東友等各帶舳板數號駐泊雙閘與陸營相依護重保一綫之路以安萬眾之心而東路之防則有武明良派隊毀賊一壘一穴肅開印趙清河於十六夜派隊破賊一壘一穴十七二十一二等夜劉連捷潛撥勇隊各挾火具焚賊二壘二穴計三次俘獲三十人斬馘過五百人曾國荃與諸將議制敵之策尤莫若審賊所向掘地數仞隧而迎焉二十四日副後營劉連捷令部卒就營外荷鋤開掘不移時而內外洞穿適與賊遇

抽刃迭刺聚而殲之二十五日蕭開印復穿一地道熏以毒煙灌以穢水賊亦無一生者次夜風雨交作劉連捷伺賊無備於四更時帶胡俊升楊致仁分三路冒雨出濠襲破潛挖地道之三壘俘斬數百損我胡俊升楊致仁二人越三日劉連捷營中發土丈許豁然開朗賊不得遁盡瘞於地道之中蕭開印武明良朱洪章等約於三十夜薄壘攻賊蔣仲梅黃禮芳中賊流矢並歿於陣蕭開印催隊猛進立踰堅壘二座斬二百餘級縛五十餘人十月初一日副後營鑿開地道一處初二日曾國荃中軍又鑿開地道一處伐木作薪堵塞洞口賊乃無能爲矣維時王可陞留防蕪湖之兩營至是亦來入濠助守曾國荃見兵力



愈厚可決一戰遂於初三四等日乘賊惛伏進拔十數卡初四夜三更曾貞幹彭毓橘蕭孚泗偵知西路三汊河隔岸之賊將圖宵遁乃整勁隊分道並出曾國荃亦令李臣典朱洪章劉連捷劉蔣昌武昌良等徑攻東路前敵四壘以防雨花台及南門之賊抄襲我軍之追賊者天甫向曙縱焚四壘壘賊逸出悉就誅夷而西南諸壘中瞭見東路火發光燭霄半益無固志棄壘爭竄適曾貞幹率黃潤昌王廷耀步軍同楊鈞南騎隊馳至遂由善橋追賊至板橋周村一帶彭毓橘蕭孚泗張詩日熊登武李祥和胡松江張光明周惠堂等步軍及周日昇彭言志朱雲章趙三元伍維壽等騎隊亦追賊至南路牛首山一帶自辰至

已埽平賊壘數十座擒賊近四百入斃殿後悍賊約七千人王  
可陞楊心純武交清何玉貴趙清河等軍搜剿敗匪直出方山  
之西詎南門外雨花台兩旁留守之賊勾結城賊齊出大股截  
我歸路幸劉連捷副後營並長勝嘉字信字各營隊伍橫擊於  
左易良虎曾良佐楊西平羅朝雲晏澧週各營親兵夾擊於右  
賊始返奔其在東路者向南門繞城而遁其在西南者向秣陵  
關一路而遁是日之戰我軍小有傷折而殺賊殆難以數計此  
九月十三至十月初五等日連破地道乘勝解圍之情形也  
查蘇浙諸賊酋大舉入寇腐聚金陵意圖吞噬我營合犯上游  
計甚狡毒仰賴

聖主威福將士同心以病餘之孱兵當非常之兇醜苦守力戰時閱四十六日以寡禦眾出死入生卒能挽回危機保全大局在事文武實著微勞除曾國荃曾貞幹係臣胞弟不敢仰邀議敘外所有尤爲出力之按察使銜江西卽補道劉連捷等七十三員謹先開單籲乞

恩施以昭激勸其餘出力人員並水師員弁容臣查明彙案奏獎至副將倪桂等二百七員弁均係立功後力戰陣亡深堪憫惻相應另繕清單請

旨敕部分別議卹所有金陵各營守四十六日得解重圍緣由謹會同湖廣總督臣官文江蘇巡撫臣李鴻章由驛六百里

馳奏伏乞

皇太后

皇上聖鑒訓示謹

奏

近日軍情仍請

簡派大臣會辦軍務片

同治元年十月二十七日

再近日軍情金陵解圍援賊雖退而尙留悍賊在於秣陵關六  
郎橋等處多築堅壘層層布置曾國荃以病者未痊傷者太多  
俟新募之卒到營添補足額再行出隊痛剿目下仍飭各營嚴  
密防守不少鬆懈僞忠王李秀成回蘇之後分黨留守金陵並  
分股力攻九洑洲官營圖犯江北提督李世忠親赴九洑洲十  
七十八十九等日賊匪四面猛撲李世忠竭力堵剿幸獲保全  
惟皖北廬州兵力不厚而和含巢縣無爲舒桐等屬處處空虛  
臣實深以爲慮甯國黃文金胡鼎文等巨股於初五日渡過灣  
沚占踞西河鮑超派宋國永於初八日攻剿西河之賊未能得

手擯折勇丁數百人水路糧運被賊梗塞臣派員於繁昌南陵多雇民夫趕辦陸運又派湖北調來之何紹彩等營由南陵前往援助保護陸路又自金陵調出王可陞五營由蕪湖前往援助冀通水路總期能通運道而後能保鮑超之營壘能保營壘而後能守甯郡之城池別有賴古等股攻圍旌德縣城該城係衢州鎮總兵朱品隆駐守十月初十日賊薄城下十二三日猛撲兩次十五日官軍出城迎戰敗挫一次朱品隆以病勇太多米糧太少請援甚迫臣調左宗棠由浙派來之王文瑞一軍自南路休甯前進調駐防蕪湖之周萬倬一軍由北路涇縣前進南路救援旌德不知趕得及否今歲夏秋以來疾疫大作舊時

勁旅頓變孱軍臣已三次具奏閏月中旬而後羣賊環逼應接不遑今幸仰託

聖主威福金陵解圍忠侍兩僞王鼠竄而去大局尙可支持惟甯國與旌德同時喫緊鮑超張運蘭朱品隆諸軍病餘羸卒萬難遽振自金陵至徽州祁門八百餘里地段太長賊股太眾加以皖北十餘城毫無準備臣反覆籌思實恐潰敗決裂盡隳前功閏八月十二日臣奏請

簡派大臣來南會辦仰蒙

優詔慰問未荷

俞允嘖接嚴樹森來咨有皖北各軍統歸臣處調度之奏誠恐

聖主誤采外閒浮僞之名不察微臣竭蹶之狀直待貽誤事機再行陳奏則已晚矣查三年以前江南

欽差大臣一人兩江總督一人督辦徽防一人督辦甯防一人管轄李世忠苗沛霖兩軍之

欽差大臣一人臣今一身所處兼此五人之職而又新添安慶池州等沿江十餘城即使才力十倍於臣者已有顛蹶之患況如臣之愚陋乎合無籲懇

皇上天恩簡派大臣與臣會辦諸務縱不能復前此五人之舊但能添一人二人俾臣責任稍分案牘稍簡更得專精竭慮圖報涓埃除戰守詳細情形另行具奏外謹將近日軍情及微臣



辦理竭蹶緣由附片具奏伏乞

皇太后

皇上聖鑒訓示謹

奏